

Na osnovu člana 51. tačka a) Zakona o visokom obrazovanju ("Sl.novine TK broj: 8/08, 11/09 i 12/09) i člana 72. stav (1) tačka c) Statuta Univerziteta u Tuzli, (Prečišćeni tekst),Upravni odbor Univerziteta u Tuzli, na prijedlog Senata, na sjednici održanoj 22.11.2011. godine donio je

P R A V I L N I K
o radu Fonda za nagrađivanje studenata dodiplomskog studija i naučno i stručno usavršavanje zaposlenika Univerziteta u Tuzli

Član 1.

(1) Ovim pravilnikom uređuju se vrste priznanja koja se dodjeljuju studentima dodiplomskog/ prvog i drugog ciklusa studija (dalje: studenti), uslovi za dodjelu priznanja, te postupak dodjele priznanja na Univerzitetu u Tuzli.

(2) Nagrađivanje studenata prvog i drugog ciklusa studija, odnosno integriranog studija prvog i drugog ciklusa studija na Medicinskom i Farmaceutskom fakultetu Univerziteta u Tuzli (dalje: Univerzitet), ima za cilj podsticanje i razvijanje interesa studenata za okončanje studija u roku i postizanje boljeg uspjeha tokom studija.

Član 2.

Za nadprosječne rezultate ostvarene u toku studija studentima se dodjeljuju slijedeća priznanja:

- a) Zlatna plaketa Student generacije,
- b) Novčana nagrada.

Član 3.

Odluke o dodjeljivanju pojedinih oblika nagrađivanja studenata donosi Odbor Fonda na način i po postupku utvrđenim ovim Pravilnikom i Poslovníkom o radu Odbora Fonda.

Član 4.

Za postignuti uspjeh na dodiplomskom/prvom i drugom ciklusu studija, odnosno integriranom studiju prvog i drugog ciklusa studija na Medicinskom i Farmaceutskom fakultetu u akademskoj godini, jednom studentu Univerziteta se dodjeljuje posebno priznanje u obliku Zlatne plakete Student generacije Univerziteta.

Član 5.

(1) Zlatna plaketa Student generacije Univerziteta dodjeljuje se redovnom studentu koji je u redovnom roku, bez obnavljanja godine, najranije okončao studij sa najvećom ukupnom prosječnom ocjenom na Univerzitetu od najmanje 9,50, koji je diplomirao najkasnije do kraja tekuće akademske godine u kojoj je ovjerio zadnji semestar.

(2) Ukoliko dva ili više studenata, u smislu prethodnog stava, ostvare identičnu prosječnu ocjenu (zaokruženu na dvije decimale), oba, odnosno svi ostvaruju pravo na dodjelu Zlatne plakete Student generacije Univerziteta.

(3) Dobitniku Zlatne plakete Student generacije Univerziteta pripada i nagrada u vidu školarine za naredni ciklus studija na Univerzitetu.

Član 6.

U svrhu dodjele priznanja iz člana 5. ovoga pravilnika, dekani fakulteta/Akademije su obavezni Odboru Fonda dostaviti Listu kandidata za dodjelu Zlatne plakete Student generacije

Univerziteta najkasnije do 01. novembra tekuće akademske godine, uz dokumentaciju kojom se dokazuje ispunjenje uvjeta za dodjelu priznanja.

Član 7.

Uručenje priznanja studentima vrši Rektor Univerziteta, na posebnoj svečanosti u okviru obilježavanja manifestacije povodom Dana Univerziteta.

Član 8.

Senat, Rektor i drugi nadležni organi Univerziteta mogu ustanoviti i druge oblike nagrađivanja studenata, a koji se dodjeljuju po odredbama ovog Pravilnika ukoliko je to moguće, u suprotnom organ koji ustanovi određeni oblik nagrade će svojom odlukom utvrditi postupak i kriterije za dodjelu takvog priznanja.

Član 9.

O dodijeljenim priznanjima studentima Univerzitet vodi posebnu evidenciju koja se čuva trajno.

Član 10.

Odluke Odbora Fonda o dodjeli priznanja studentima objavljuju se na WEB stranici Univerziteta.

Član 11.

Postupci započeti prije stupanja na snagu ovog pravilnika okončat će se na način i po postupku utvrđenom ranijim pravilnikom.

Član 12.

Početak primjene ovog pravilnika prestaju da važe: odredbe Pravilnika o radu Fonda za stipendiranje i nagrađivanje studenata dodiplomskog studija i naučno usavršavanje zaposlenika JU Univerzitet u Tuzli, broj: 04-38-4638-1/01, od 10. 10. 2001. godine i Pravilnika o izmjenama i dopunama Pravilnika za stipendiranje i nagrađivanje studenata dodiplomskog studija i naučno usavršavanje zaposlenika JU Univerzitet u Tuzli, broj: 04-5902-2.1., od 28. 11. 2003. godine i broj: 04-6183-2.3. /05, od 21. 10. 2005. godine – u dijelu koji se odnosi na studente.

Član 13.

Ovaj pravilnik stupa na snagu danom donošenja a primjenjivat će se od akademske 2011/2012 godine.

UNIVERZITET U TUZLI
Broj: 04-9904-3.1/11
Tuzla, 22.11.2011. godine

Predsjednik
Upravnog odbora

Hasiba Omeragić, dipl. pravnik